

ZAKON O KLASIFIKACIJI DJELATNOSTI U BOSNI I HERCEGOVINI

("Službeni glasnik Bosne i Hercegovine", br. 76/2006, 100/2008 i 32/2010)

Integralni – prečišćeni tekst

DIO PRVI OSNOVNE ODREDBE

Član 1

(Predmet zakona)

Ovim Zakonom utvrđuje se pojam klasifikacije djelatnosti u Bosni i Hercegovini (u daljnjem tekstu: KDBiH), značaj i cilj zakona, primjena zakona i donošenje Odluke o klasifikaciji djelatnosti u Bosni i Hercegovini (u daljnjem tekstu: Odluka).

Član 2

(Definicija KDBiH)

KDBiH je obavezan standard koji se upotrebljava pri evidentiranju, prikupljanju, obradi, analiziranju, publikovanju i iskazivanju podataka po djelatnostima značajnim za praćenje stanja i kretanja na ekonomskom, demografskom i socijalnom području u Bosni i Hercegovini.

DIO DRUGI OPŠTE ODREDBE I DONOŠENJE ODLUKE O KDBiH

GLAVA I OPŠTE ODREDBE

Član 3

(Primjena KDBiH)

KDBiH se primjenjuje:

- a) u praćenju promjena u ekonomiji i za donošenje mjera ekonomske i socijalne politike;
- b) u službenoj statistici, sistemu informisanja, evidenciji i planiranju razvoja;
- c) u prikupljanju, obradi i objavljivanju podataka shodno djelatnostima;
- d) u sklapanju ugovora i izvršavanju međunarodnih obaveza;
- e) u naučnoistraživačkom i analitičkom radu;
- f) za upis djelatnosti u statističke, administrativne i registre posebnih namjena.

Član 4

(Osnov za donošenje)

KDBiH kao statistički standard utvrđuje se u skladu sa Zakonom o statistici Bosne i Hercegovine ("Službeni glasnik BiH", br. 26/04 i 42/04).

Član 5

(Osnov KDBiH)

- (1) KDBiH zasniva se na Statističkoj nomenklaturi ekonomskih aktivnosti Evropske unije (NACE) i upoređiva je sa Međunarodnom klasifikacijom djelatnosti Ujedinjenih nacija (ISIC).
- (2) KDBiH mora stalno da se usklađuje sa svim zvaničnim promjenama Statističke nomenklature ekonomskih aktivnosti Evropske unije, a time i sa međunarodnom klasifikacijom djelatnosti Ujedinjenih nacija.

GLAVA II DONOŠENJE ODLUKE O KDBIH

Član 6

(Donošenje i sastavni dio Odluke KDBiH)

- (1) Odluku o KDBiH donosi Agencija za statistiku Bosne i Hercegovine (u daljnjem tekstu: Agencija).
- (2) Sastavni dio Odluke iz stava (1) ovog člana čine:
 - a) Klasifikacija djelatnosti Bosne i Hercegovine,
 - b) Klasifikacija djelatnosti Bosne i Hercegovine sa objašnjenjima.
- (3) Agencija donosi Odluku iz stava (1) ovog člana u saradnji sa Federalnim zavodom za statistiku i Zavodom za statistiku Republike Srpske (u daljnjem tekstu: entitetski zavodi).
- (4) Usklađivanje KDBiH sa međunarodnim standardima iz člana 5. stav (2) ovog Zakona obavlja Agencija u saradnji s entitetskim zavodima donošenjem Odluke o reviziji KDBiH ili Odluke o novoj KDBiH, zavisno od obima promjena.

Član 7

(Usaglašavanje KDBiH)

- (1) Entiteti i Brčko Distrikt Bosne i Hercegovine (u daljnjem tekstu: Brčko Distrikt) mogu predlagati razradu klasifikacije djelatnosti na dodatne nivoe koji nisu određeni Odlukom o KDBiH iz člana 6. ovog zakona.
- (2) Razrada klasifikacije djelatnosti iz stava (1) ovog člana može da se vrši jedanput godišnje.
- (3) Predlozi razrade moraju da se dostave Agenciji do 1. septembra tekuće godine.

(4) Agencija, entitetski zavodi i Brčko Distrikt dužni su usaglasiti predloge razrade na dodatne nivoe iz stava (1) ovog člana.

(5) Usaglašeni predlog razrade iz stava (1) ovog člana Agencija donosi do 1. decembra tekuće godine.

DIO TREĆI PRIMJENA KDBiH I STATISTIČKI REGISTRI

GLAVA I PRIMJENA KDBiH

Član 8

(Upotreba KDBiH)

KDBiH se upotrebljava za određivanje djelatnosti, odnosno za sva razvrstavanja po djelatnostima poslovnih i drugih subjekata i njihovih dijelova za potrebe statistike, različitih službenih i drugih administrativnih zbirki podataka (evidencije, registri, baze podataka i sl.).

Član 9

(Hijerarhijske kategorije KDBiH)

(1) Hijerarhijske kategorije grupisanja KDBiH privrednih i drugih subjekata određuje Agencija u saradnji sa entitetskim zavodima za statistiku Odlukom o KDBiH iz člana 6. ovog zakona.

(2) Hijerarhijske kategorije grupisanja KDBiH iz stava (1) ovog člana moraju biti usklađene sa uslovima iz člana 5. ovog zakona.

Član 10

(Razvrstavanje pravnih i fizičkih lica)

Prema KDBiH razvrstavaju se po djelatnostima:

- a) pravna i fizička lica koja obavljaju djelatnost u skladu sa zakonskim propisima,
- b) organi vlasti i uprave na nivou države,
- c) organi vlasti i uprave na nivou entiteta i Brčko Distrikta,
- d) organi vlasti i uprave na nivou kantona u Federaciji Bosne i Hercegovine,
- e) organi vlasti i uprave jedinica lokalne samouprave u Bosni i Hercegovini.

Član 11

(Nadležni organi za razvrstavanje subjekata po djelatnostima)

Razvrstavanje po djelatnostima subjekata iz člana 10. ovog Zakona, u skladu sa KDBiH, obavljaju nadležni organi Bosne i Hercegovine, entiteta i Brčko Distrikta, u skladu sa zakonima i drugim propisima Bosne i Hercegovine, entiteta i Brčko Distrikta.

Član 12

(Nivoi razvrstavanja i razvrstavanje prema pretežnoj djelatnosti)

(1) Subjekti iz člana 10. ovog zakona i njihovi dijelovi razvrstavaju se u hijerarhijske kategorije KDBiH u skladu sa Odlukom o KDBiH iz člana 6. ovog zakona, prema djelatnosti koju obavljaju.

(2) Ako poslovni subjekti iz stava (1) ovog člana obavljaju više djelatnosti, razvrstavaju se prema djelatnosti koju pretežno obavljaju. <https://advokat>_____

GLAVA II STATISTIČKI REGISTRI

Član 13

(Nadležni organi za vođenje statističkih registara)

(1) Nadležni statistički organi na nivou Bosne i Hercegovine, entiteta i Brčko Distrikta vode statističke registre subjekata iz člana 10. ovog Zakona u skladu sa KDBiH.

(2) Sadržaj, oblik i način vođenja registra iz stava (1) ovog člana određuje se u skladu sa međunarodnim standardima i standardima Evropske unije.

DIO ČETVRTI PRELAZNE I ZAVRŠNE ODREDBE

Član 14

(Usklađivanje zakona)

Entitetski zakoni i zakon Brčko Distrikta, kojima se uređuje klasifikacija djelatnosti, uskladiće se sa ovim Zakonom u roku od 90 dana nakon njegovog stupanja na snagu.

Član 15

(Donošenje podzakonskih propisa)

Entiteti i Brčko Distrikt donijeće podzakonske akte o razvrstavanju subjekata iz člana 10. ovog Zakona, u skladu sa ovim Zakonom i Metodologijom za statističku primjenu KDBiH, u roku od 120 dana od dana početka primjene ovog Zakona.

Član 16

(Prelazni period za primjenu važećih propisa)

U prelaznom periodu, do usaglašavanja zakona iz člana 14. ovog Zakona, za statističke i analitičke potrebe primjenjivaće se do sada važeći propisi koji uređuju klasifikaciju djelatnosti.

Član 17

(Stupanje na snagu)

Ovaj Zakon stupa na snagu osmog dana od dana objavljivanja u "Službenom glasniku BiH".

Samostalni članovi Zakona o izmjenama Zakona o klasifikaciji djelatnosti u Bosni i Hercegovini

("Službeni glasnik Bosne i Hercegovine", br. 32/2010)

Član 4

(1) Entitetski zakoni i zakon Brčko Distrikta, kojima se uređuje klasifikacija djelatnosti uskladiće se s ovim zakonom u roku od 90 dana nakon njegovog stupanja na snagu.

(2) Entiteti i Brčko Distrikt donijeće podzakonske akte o razvrstavanju subjekata iz člana 10. ovog zakona, u skladu sa ovim zakonom i Odlukom o KDBiH iz člana 6. ovog zakona, u roku od 120 dana od dana početka primjene ovog zakona.

Član 5

Ovaj zakon stupa na snagu osmog dana od dana objavljivanja u "Službenom glasniku Bosne i Hercegovine".